

四庫全書

集部

欽定四庫全書

集部

宋百家詩存卷

三十九
四十九

詳校官監察御史臣孫家賢

主事銜臣徐以坤覆勘

總校官庶吉士臣倉聖脉

校對官中書臣李 荃

謄錄監生臣孫 炯

欽定四庫全書

宋百家詩存卷三十九

嘉善曹庭棟編

菊潭詩集

吳惟信字仲孚雲川人居華亭白鶴村詩名籍甚吳
中有老儒麻先生記問該洽惟信客吳過諸塗扣以
近詩因誦傷春一首麻先生屈膝下拜曰子謫仙人
也老夫雖欲效顰無可置喙矣與浮玉施樞交善投

贈亦最多樞有和菊潭韻題秋潭買山圖秋潭其伯
兄也惟信名著江湖間故樞有和感懷詩云終有徵
書訪綺園既老不得一遇故樞有贈詩云誰知書劍
兩無功所存菊潭詩集其蕭散清潤之致與樞亦在
伯仲之間

春閨怨

細柳輕煙鎖畫樓樓中人去水長流琵琶聲斷梅花落
別是春風一種愁

蘇隄清明即事

梨花風起正清明
遊子尋春半出城
日暮笙歌收拾去
萬株楊柳屬流鶯

湖上雨吟

濕了荷花雨便休
晚風歸柳淡於秋
一生不作機心事
合轉船頭向白鷗

賀史守鳳雛滿月

玉手歌姬托鳳雛
堂前畫額旋調朱
春風吳會宜芳草

試問他人種得無

題秋江晚照圖

水光只肯淨涵虛分浦通村路却無風日向低鴻鴈落
釣竿一半出菰蒲

曉吟

翠帳香銷卷碧紗風梢殘雨濕欄牙蜻蛉亦被涼勾引
清曉低飛入水花

春咏

草堂燕子未歸時
香鼎灰飛入硯池
看徹唐人詩一卷
夕陽猶在杏花枝

贈別上官良史

不惜黃金一醉君
喚歌催舞語紛紛
天涯明月空相憶
寒鴈無聲入斷雲

秋夕

西風吹露下秋空
烏鵲無聲占碧桐
天氣微涼人好睡
闌干閒在月明中

野望

閒與蘆花立水邊
歸心客思兩茫然
夕陽收盡天風急
一樹寒鴉落野田

辭史侍郎

事到依人易策勳
合歸收拾北山雲
春風入手非閒用
種得梅花却寄君

春夢謠

銷金帳掩水沈煙
髻滑金釵落枕邊
魂夢不知春已去

誤隨蝴蝶過鞦韆

重拜和靖墓

片玉沈山草亦珍
斷碑殘石當麒麟
君王別為開門戶
不欲梅花見路人

閨怨

病起傷春獨倚門
喚人鸚鵡隔簾聞
無情最是東風惡
瘦却梨花一片雲

仙興

宮殿高高在五雲鶴搖松露滴行人洞門不放東風過
留得桃花一院春

山居春興

林雪消寒滴春風入草廬好山分客看閒地課童鉏竹
瘦偏宜鶴泉清直見魚邇來因苦詠零亂一牀書

寄越上高疎寮

便教煙雨畫成圖爭似歸來有賀湖鏡裡精神西晉有
詩家標準晚唐無惜花春盡鶯吟苦敲竹風清鶴夢孤

世事正多心早嬾著書贏得靜工夫

立春日即事

檢殘玉歷又春來造化無私命轉乖
照水莫嫌窮面目看山長有好情懷
生期惠遠眠雲過死問林逋借地理
詩到夜寒吟更苦一枝梅雪映書齋

送伯氏秋潭謀居

朝吳暮楚幾時休未必江湖有白鷗
萬事莫如歸去好一椽當為老來謀
春天吟思行花徑夜月琴聲坐竹樓

但得餘齡無俯仰曾公食粥亦風流

移居即事

山移無復昔人賢隨分長安辨一椽掃室敢言天下事
閉門儘可雪中眠携瓶與客同沽酒接綆過鄰自汲泉
到此始知閑是福居山未必似居廡

呈雲麓史侍郎

若教儘儘說漂沈却恐無憍老不禁百拙難隨今日巧
一貧方識古人心牛羊歸盡荒郊闊猿鶴愁多故國深

亦欲以詩為活計世間何許覓知音

謀生

謀生一事到成功消得湖邊地幾弓
韋曲有花留杜老洛陽無客問盧仝
春風燕子虛檐外夜雨蒼聲小徑中
所立規模雖冷澹絕勝彈鋏舊飄蓬

贈越僧意書記

一衲冰霜二十年不知妙用自誰傳
心能轉物方為佛詩到名家亦是仙
喜客稍寬沽酒禁愛閒多結住山緣

今冬約我西湖上同看梅花坐釣船

自序

一劍辭家竟陸沈夢思空向故廬深
查迷河漢千年恨樹隔關山萬里心
衣垢正憐貧未去鏡明忽有老相尋
春歸不與人為約青草催詩亦嬾吟

秋夕

雨聲雲氣暮蕭蕭羅扇恩疎井樹凋
心事暗隨歸夢去壁燈留與可憐宵

咏猫

弄花撲蝶悔當年喚到殘糜味却鮮不肯春風留業種
破瓊尋夢佛燈前

傷春

白髮傷春又一年閒將心事卜金錢梨花瘦盡東風軟
商畧平生到杜鵑

曲江留別

手彈珠淚向離筵殘日依依上客船流水自隨人影去

夕陽只在曲江邊

蘭

寒谷初消雪半林
紫花搖弄晝陰陰
是誰曾見秋香處
千古春風楚客心

古梅吟橐

吳龍翰字式賢新安人咸淳元年領鄉薦授編校國史院實錄宋亡不仕築樓三層終日吟嘯其中樓前有古梅一樹即以自號嘗從學方秋崖秋崖和其詩

贈之有隽永纔殘橐竒溫只破瓠之向其相賞蓋在
世俗外者秋崖沒龍翰哭以詩云一瓣南豐後他師
不復求

曉發姑熟城

鶉啼驚夢敲春枕花落迎風打曉憲携杖攬先出城去
角聲吹月墮寒江

春晚留淮上

淮山歷歷春雲淡淮水湯湯夜月輝此處杜鶉啼不到

江南行客未成歸

贈謁士

一掬鄉心寒似月
半生行跡過於雲
春風滿擔詩千首
是處青山留得君

白紵詩

吳宮煙水碧迢迢
瓊樓十二凌青霄
北方佳人顏如花
素衣濯濯明朝霞
雲母屏風珍珠箔
香銷金鴨春寒薄
璧月流光羅綺筵
白紵舞殘月欲落
君看月落夜潮平

吳江閩兮越江深
吳王醉越王醒

嘉禾舟中

趁得東風便
千錢買一舟
嘉禾三日路
陰木四山秋
野色絨詩思
鵲聲替客愁
煙波渺無際
是處可盟鷗

嘉禾沈園

景物何其異
虛崑人力成
清池沈鳥影
高樹落蟬聲
花月樓臺麗
香風簾幙輕
我來一吟賞
莫怯百杯傾

重陽客中

愁裡重陽近他鄉酒易酤秋風詩鬢短寒夜客燈孤
筇笠月穿破荷衣霜打枯有懷吟未就端不為催粗

久客湖海買舟西還

萬里煙波興渺然愁心繫在灞橋邊歸裝詩少不成載
自拗梅花湊滿船

馮永之號冰壺工水墨丹青

半生江海冰壺翁擔風荷雨七尺筇爛嚼扶桑紫金椹
玉樓光徹十二重飽喫孤山白玉花一鑿九竅開玲瓏

能擘明月鑄雙眼故能搜索異景窺神功能穿星斗挂
胸次故能神遊八極之鴻濛手撼煙雲出硯石酒酣奮
筆驅雷風迴山轉海有力量頃刻驚溪幻出白練之寒
江碧玉之奇峰瀟湘洞庭忽在眼冷落煙竹蒼梧空碧
天萬里渺無際但見隱隱孤飛鴻江門過雨涼如許木
落蕭蕭秋滿浦月明何處起漁歌小艇人歸息搖櫓鷗
沙漠漠洲渚昏無數寒鴉棲古渡景物變態雖無窮筆
端有口一一吐研丹吮粉尤精奇直與王爵爭毫釐寧

肯沒骨媚時好逸氣徃徃追徐熙一點春風幾花卉化
工權柄君所私獻之犍牛韓幹馬滕王蛺蝶僧繇魚下
筆衆妙能各足開卷錯落千珠璣顧家層樓連天起俗
士那敢窺籬籬嘔心抽思何自苦乃使肌骨化作枯松
枝君不見梅邊有狂客風簷雪虐寧恣饑吟軀未老貌
先老不覺兩鬢紛如絲

靈金山觀金燈

嵯峨靈金山峭壁偕天長嶺岼萬蒼翠無復敢頡頏登

臨勞遠目久羈塵俗韁天風送筇履此願今一償所喜
侍老親鬲扇升崇岡琪樹藹柔絲瑤草超羣芳松聲入
幽懷妙樂非笙簧好鳥相勸酬醉我林中觴我吟遊仙
詩客和招隱章起舞涕歡笑人影亂夕陽何方阿堵女
山北敞虛堂石池閤甘泉瓦爐騰妙香昔言山有靈金
燈夜呈祥信哉華嚴經佛眉施白光澄公有妙力一笑
通禪房詎知山石間而有金光藏崦嵫下失景山氣相
激揚若以色見佛於法參與商我生事迂濶咄咄顛復

狂讀書獵千古浩氣凌八荒乃欲落鬢髮掬水曹溪傍
吹以無孔笛倒騎牛一場手擊混沌開有此硬脊梁指
點生死根捧喝行諸方

辛酉秋吳畫士寫神

功名自有幾鑿輩榮辱寧干蓑笠翁煩作田園秋興畫
短簷斜日稻花風

秋崖先生招飲荷葭塢席上賦詩

相公潭水清於玉翠屏四面環書屋石梯齒齒登蒼崖

老樹晴煙千頃綠，好花對人無俗姿。春色盈盈圍虛谷，
歸來庭院碧參差。八窓玲瓏有修竹，先生長嘯臨清流。
茱萸辛夷香滿洲，浪呼廸輩偕春遊。綠醅深注碧玉甌，
我醉起舞相勸酬。願祝先生相業侔伊周，運留侯帷幄
之籌，橫萊公野水之舟。莫負蒼生望，安石東山高卧凌

清秋

先生所居
即相公潭

京城寓居春日

春城庭院柳風輕，簾影玲瓏受曉晴。紅日半窓吟夢覺，

伊啞牆外賣花聲

宮詞

舞罷霓裳寶髻垂
桃花扇底暖風吹
夜深內殿重開宴
手撚燈花畫翠眉

層翠樓

結樓書屋傍
獨占林塘幽
飛簷瞰寒碧
照影虹霓浮
層巒萬蒼翠
峭岬生戈矛
黛眉與螺髻
故故含嬌羞
此時樓中人
片心隨白鷗
風吹烏紗帽
露滴紫綺裘
白雲入

我望逸興何悠悠沆瀣供晨飧酌以碧玉甌朝曦散朱
景曠納十二樓願言追黃鶴致身八極遊慷慨笛聲發
滿樓明月秋

凍吟

座右插梅花座右橫詩筆風雪墮寒肩先生方把膝

春興

聞說春醪熟提壺喚客嘗乾坤一釀覓花氣百和香

別吳中三年寄湖上一二知己

麥秋天氣覺清和老盡春風庭下莎
曉月荒山啼蜀帝夕陽高樹咽齊娥
三年寒我滄波約一夜思君白髮多
世路不堪重著脚相期何地理漁蓑

感興四首

多病頻辭客無人自掩扉
斲松供藥火葺葉補漁衣
日月雙丸疾乾坤一粟微
不須求外道悟此是元機
野興在漁艇風潮不憚勞
苔生肥石骨水落瘦溪毛
霜重稻梁熟天清鴈字高
醉餘歌古調人事析秋毫

閉門逃俗客携酒過禪關
竈古茶煙斷碑殘雨薜癩秋
僧行影瘦夜鶴病翎寒
片月隨人到孤琴對佛彈
百事謀何拙一閒夢亦清
定交毛穎子結怨孔方兄
鶴影雲煙瘦蟬聲風露輕
寸心虛白久蛻骨待丹成

金陵寓樓居

樓中有酒客身閒約住孤雲
共往還搖落碧桃春欲去
倚欄無語看鍾山

過涇邑水西縣尹先伯祖嘗為邑簿領耆儒有

識者

客裏身無事，乘閒過水西。
清波明白鷺，綠樹帶黃鸝。
酌酒道旁飲，吟詩石上題。
邑中逢故舊，坐定說環溪。

泊蕪湖縣

古邑蒼江曲，鱗鱗葦屋橫。
酒樓歌伎集，魚市販夫行。
野曠雲無勢，江流月有聲。
橋邊息詩擔，譙鼓更分明。

庚申冬壽秋崖先生

瑞宿當年降世閒，祁山深處著仙壇。
梅開冰壑珊瑚瘦。

竹聳霜空碧玉寒清氣胚成龜鶴相丹田鍊就虎龍蟠
待教鬚鬢渾如雪恰寫耆英與世者

春晚郊行

芒屨竹杖出柴關撿校園林脚不閒翠幄初張花結局
錦棚未解筍排班煙波鷗鷺春風外桑柘牛羊夕照間
野興不須邀客共一尊白酒對黃山

秋日遊竹會寺

修竹陰陰古道場誰憐兵火地荒涼晚山俱似佛頭絲

秋草不如僧髮長
白酒莫辭今日醉
黃花仍作去年香
禪翁留客殷勤甚
相對藤牀話夕陽

子陵釣臺

峭壁千尋屹曉寒
何年人插釣魚竿
煙霞不受衣冠浣
天地那如蓑笠寬
幸有同肩黃屋貴
不妨伸脚白雲端
能令漢室亦增重
可作巢由一例看

夜泊富陽

片帆東去一鷗輕
消得天公十日晴
新酒一尊詩幾首

故鄉千里月初更煙收山翠揩摩淨風軟江波熨貼平
苦是狂懷費消遣船頭吹笛到天明

巖灘對月憶雪壺亡弟

邛君看月此徘徊今來月明君不來安得清光刀剪破
為分一半到泉臺

婺源道中憩午

小息吟身古木陰詩情羞澀錦囊輕風煙不受人收拾
擔閣行山半日程

濯足五溪成

東風吹水綠鱗鱗
小漱清寒入齒齟
萬里流邊濯雙足
恐行五嶺澹晴雲

春日吳中

照人芳樹遲遲日
吹面垂楊拂拂風
客思一筇携不盡
鳥聲多在落花中

俠客行

擊筑復擊筑
欲歌雙淚橫
寶刀重如命
命如鴻毛輕

再過孤山

一函鶴骨已塵埃
空築孤山碧玉臺
添種紅蓮千萬朵
梅花從此不須開

冬夜二首

讀罷牀頭一卷易
曉風乾盡銅壺滴
起傍危欄嘯一聲
月明何處人橫笛

一屋白雲無鎖鑰
酒酣要摘梅花嚼
相逢石鼎老彌明
吟罷松梢月欲落

晚舟泊長河

詩客行裝少孤舟一葉輕寒鴉隨日落秋鴈破霜鳴山
色攢心事江聲咽世情故鄉無百里酤酒話歸程

冬夜山中

寒入鴈聲霜滿地香沈梅影月當岵獨鶴歸來童亦睡
微風簌簌落松釵

贈詩客梅窗

騷人行脚逼天涯何處青山不是家惆悵舊時雲外鶴

結巢窗外守梅花

樂府四首

妾心江岸石千古無變更
郎心江上水倏忽風波生
瑟瑟涼風來妾身後
秋扇安得復炎熱相攜不相厭
製衣寄夫婿妾有冰雪段
中間連理枝不忍翦教斷
殘月小樓西鵲啼
思欲迷妾夫在天南
何不那邊啼

夜興

山房靜對碧巉岼
與客歌騷夜未闌
客去燈寒眠未穩

興隨明月在關干

己未試監假道於嚴報謝使君

秋試賢關擲雉廬道經隣郡拜真儒棠陰日暖鳥聲雋
苔跡月明更影臞春野一犁今有犢暮歌五袴昔無襦
片帆願借吹嗟力一舸清風不用租

嚴郡謁烏龍廟遇打碑

何年故處士靈魄此為家古壁填蒼蘚空庭隘落花山
墳穿去鶴廟祭下饑鴉巫祝打碑賣神功播海涯

春晚

萬綠叢中春事闌
楊花如雪滿江干
露沾花片蝶飛重
雨著芹泥燕寢寒
愁到吟腸詩綰斷
夢依碁局客敲殘
何時買得青山住
煉就蓬壺換骨丹

古嵩寺

古嵩靈跡異
故故兀吟鞍
石溜濺碁濕
松風泣笛寒
露華僧袖重
曙色佛燈殘
白社開何日
談經上石壇

見王廣文

旅食京華不自謀，
不堪曲盡鷓鴣裘。
一牀風雨孤燈夜，
千里江山兩鬢秋。
笑索寒梅吟苦句，
醉拈秃筆掃窮愁。
學人翻笑孫明復，
強乞希文一點頭。

牛渚山觀大江

巨靈劈破蒼山石，
鞭起九龍入空碧。
山分兩半合不成，
夾住長江數千尺。
九道驚湍相擊撞，
雷聲怒發誰敢當。
神蛟出沒不可數，
往往殺氣摩穹蒼。
嗚呼蜀道行且難，
劍門險似鐵門關。
一夫可敵萬夫勇，
大開棧道通聲函。

固知長江當城壁立此天塹限南北東南王氣無窮年
此江未必成桑田君不見逆亮百萬鼓腥風海舟出關
一掃空書生不能長槍與大劍只坐帷幄收奇功

秋深過田家

策杖行行過石橋農家鷄黍遠相招田鋪碁局鷺鴉下
山展畫屏煙雨描病骨枯於秋後葉詩懷雄似海東潮
一聲老鶴松梢上賸欲乘風到九霄

春日松陰小憩

瘦筇扶我過林端
無狀東風掠鬢寒
貪數青山不知去
松花吹滿石棊盤

水邊蚤梅

數花淡淡著寒煙
泄漏春光老屋邊
為被清池瀉疎影
一枝分作兩枝妍

繁昌道中

江天日暖竹為輿
獵獵春風載此臞
湊入灞橋成一畫
楊花吹雪糝吟鬚

過和州報恩寺唐張籍故居也

昔年此地著書人
詩骨成塵草木深
突兀眼前僧結屋
塔鈴風裏替君吟

張麗華墓

結綺臨春跡已塵
尚餘抔土鎖娉婷
玉顏不及隴頭草
歲歲春風吹得青

登長干寺塔

金陵王氣已銷沈
幾度憑欄愁滿襟
往事僅存南北史

傷情空費短長吟
龍蟠故國山河壯
鳳去荒基草木深
舊物尚餘吳塔在
夕陽移影照江心

詩境

流水環詩境
未容塵土侵
步迂莎徑曲
坐占草堂深
秋句蛩分和
山杯鳥勸斟
好懷無客共
相對一瑤琴

哭羅潛齋

此老古之學
文章富石渠
宦情雲淡薄
吟鬢竹蕭疎
未購茂林橐
空埋沒冢書
北郊相弔處
寒日照躊躇

謾題

故曠疎林下清風吹鬢毛
傍梅讀周易對酒說離騷
詩
思秋雲澹古懷明月高
五湖天地別煙水綠平篙

過淮南湖

黃塵茫茫北風起黃蘆蕭蕭日色死
百萬征夫血怒流
點污淮南一湖水向來失著圖
中原一朝此地化為邊
養兵百年不用力將軍金印慙空懸
南湖南湖君莫渡
萬仞山高鬼門戶
夜夜青燐照斷蓬
孤自戴觸髅舞

有所思

乘鸞人去玉簫寒雲斂
巫山曉夢殘柳線不堪繫離別
自和煙雨搭闌干

登當塗凌歊臺

高臺突兀玉千尋尚想當年翠輦臨
坐守夕陽移午塔
我吟未了讓蟬吟

歸途績溪界喜見十里崑

策杖前溪去吾鄉此路分
雨磨山出色風約水成文
歸

信憑秋鴈思親望白雲碧嶺今日見快飲帶微醺

先曾大父作竹夫人銘北窗蘧蘧偃爾冰肌毋
狗其名乃邪其思甚有思致余不能道漫作俳

優語

水沈為骨玉為肌專寵涼臺合有時長得夫人容兩足
容星不遣史官知

春日書所見

寒雲漠漠暮天低社鼓聲中日欲西隔岸垂楊遮酒店

風帘移影照寒溪

春懷

梨花院落雨初晴
小醉醒來睡不成
過客光陰易老態
故人山色却長情
歌喉啞啞鳥聲隳
舞袖翩翩蝶翅輕
好景相看作撻盡
閉門不覺了清明

春山晚望

糝糊數疊屋前山
翠色欺凌詩鬢寒
啼鳥一聲泥滑滑
晚鐘春雨過林端

王廣文

宦居三載滿嚴駕出山城詩擔梅花白離杯竹葉清更
籌催客夢斤堦記行程去去驂鸞鶴長歌上玉京

夏日書事

園林數閒屋長掩竹笆籬檻柳拂碁局瓶花落硯池蝶
狂如被酒蟬咽似吟詩脫帽挂崑石涼颼入鬢絲

草堂

蒼煙落日草堂深淺淺寒侵白玉簪等客不來童睡去

自搖修竹和新吟

春郊即事

登臨故故檢春工
小立蒼苔數落紅
院宇人歸春寂寂
秋千閒在月明中

寄題友梅堂友梅乃竹洲先生孫也

公昔洲多竹而孫梅作堂
月窓傳瘦影風壑度寒香
友也真魚水况兮可雁行
相看動吟興時吐玉琳琅

吳越歸秋晚

湖海歸來晚園荒菊幾叢秋山吟骨瘦霜葉醉顏紅
影寒溪上懷人落月中青燈滋味永不用哭途窮

座中咏蟬分韻得飢字

兩翼纔乾殼已離便升喬木最高枝銀牀葉落秋風裡
金掌盤教曉露時斷續翻成無調曲悲涼做出苦吟詩
前身應是夷齊輩高卧西山自忍飢

春晚野步

尋花籬下蝶牽引酌酒林間鳥勸酬山色不隨春態老

笛聲自起夕陽愁

離怨

楊柳如少年春風吹得老朝為白雪花暮為浮萍草明月照妾夫夜夜關山道明月分半光照妾顏色好空閨一十年芳容秋葉槁寶馬嘶妾夫歸對鏡畫眉雙淚垂前日夫悞妾今日妾悞夫妾貌不如夫去時

樓居狂吟

振衣千仞興悠哉一日看山十二回胸次誰人有邱壑

便容携酒上樓來

諸方參遍一枯藤
苦節期傳夜半燈
弘景登樓持棒喝
不容人上第三層

月洞吟

王鎡字介翁括蒼人曾為縣尉元兵陷臨安棄印綬
歸隱湖山與尹綠坡虞君集葉招山諸人結社賦詩
題所居曰月洞孤炯絕塵有桃源栗里之致焉每對
時憤悶輒形於詩如山河隔今古天地老英雄青松

秦世事黃菊晉人心語涉怨憤要不失風人之遺宋
藝文志載鎡文集二十三卷原集無傳茲為前明嘉
靖時其族孫養端編其遺詩一卷曰月洞吟

別虞君集

瓦瓶擔酒去送客石橋東湖過汀沙上船回島嶼中桃
花三月雨楊柳五更風明日思君處渡頭煙水空

送默狀上人歸天台

孤雲不定心持鉢度寒林野飯青蒲潔客程黃葉深海

風潮水發山雨曉煙沈歸到石橋日應看瀑布吟

錢塘江

涼疎萬柳條秋滿石欄橋吳越興亡事晨昏來去潮雲
開天日近水接海山遙望到西陵渡風帆穩自飄

塞上曲

黃雲連白草萬里有無間霜冷鬪饑哭天寒甲冑閒馬
嘶經戰地鷗認打圍山移戍腰金印將軍度玉關

買舟

赤欄橋上路幾度卜歸期流水無回日行人有老時潮
來江勢逆月出海門遲風順輕舟駛蒲帆盡夜吹

蚤行

客程因太蚤却費一更眠落月已歸海殘星猶在天
聲荷葉浦螢火豆花田隔岼誰家起青燈遠樹邊

別黃吟隱

飲乾分別酒話久未移舟潮水催行客海山生遠愁
聲秋浦樹鴈影夕陽樓今夜相思夢蘆花第幾洲

秋深

風露損衣裾秋深懷故廬僕方談夜夢客至得家書子
黑石蓮老棟紅霜葉疎今年籬下菊遙憶少人鉏

訪翟梅山

諸老彫零盡江湖今有誰半生行客慣多難識君遲花
屋春風酒梅山雪夜詩莫為名釣出世事正如碁

晚春即事

雲氣不分明天陰忽又晴喜涼溪鵲浴知雨樹鳩鳴仙

藥黃精飯齋蔬白椹美惜春吟未就閒踏落花行

山中

榮枯皆定數枉作送窮吟有色非真畫無弦是古琴
青松秦世事黃菊晉人心塵外煙蘿客相尋入遠林

避亂柯嶺綠坡諸公以詩見寄

柯括地西東音書久不通山河隔今古天地老英雄
局敗棊難著愁多酒易中花前多少恨無語寄春風

感秋寄白雲趙寺丞

囊裏不藏金相隨只破琴每因看月夜長動故人心
草闕河路秋風楚越砧愁來不成寐壞壁更蛩吟

谿村

水路隨山轉谿清踏軟沙斜陽曬魚網疎竹露人家行
蟹上枯岼飢禽銜落花老翁分石坐閒話到桑麻

寄友

髮影明寒鏡蕭蕭亦自憐故人難會面行客又經年晴
雪添崖瀑春雲雜晚煙相思有書札徧盡夜燈前

寄杜北山

倦客蕭蕭兩鬢秋，柳絲無力絆歸舟。
曉風落葉亂高樹，夜月行人在別州。
千里關河鄉國夢，一江煙浪古今愁。
鴈聲過盡青天濶，却憶同登望海樓。

暮春寄仙州舍弟

去年把菊醉重陽，今日誰知各異鄉。
落葉石欄霜信蚤，敗荷池屋雨聲涼。
人情好惡花甘苦，世事榮枯草短長。
別有駿鷗雙翮健，剛風摩透入蒼茫。

宿香巖院

地爐煨火柏枝香借宿寒寮到上方山近白雲歸古殿
風高黃葉響空廊敲門僧踏梅花月入夜猿啼楓樹霜
夢醒不知窗日上時聞清磬出松堂

古杭感事

國事凋零王氣衰東南豪傑竟何之雲寒廢殿排班石
草卧前朝記事碑沙漲浙江龍去遠天寬北闕鳳歸遲
可憐不老吳山月會照官家寵幸時

山居

屋頭蘚樹蛻鳴蛩池上溝泉鑿石通
香老蒲花春洞影涼生榭葉午窓風
泥瓶開酒留樵客箬笠穿雲訪藥翁
雖是一貧清似水定無徭役到山中

金陵感秋

魚書難寄水空流兩袖分風破黑裘
客夢蘆花晉城月歸心楓葉浙山秋
世情老大諳方熟愁事來時醉便休
滿目關河懷古恨如今何處問孫劉

湖山即景次尹綠坡

湖山掩映鴈潭秋
今古詩人說勝遊
綠柳影分騎馬路
丹楓葉落釣魚舟
前坡風送歸樵笛
別墅雲藏賣酒樓
長記尋梅冰雪裏
羶靴駝帽鶴裘

尹綠坡山閒吟所

苔痕分路見人家
犬護籬根卧落花
一片林塘詩境界
四時花果隱生涯
鉏山揀日春栽藥
汲水和雲夜煮茶
耕錄有文須點者
旋搖松露入硃砂

寓龍虎山中示張鍊師

蓮孟送別萬峰雲
龍虎山前過小春
草屨慣穿枯嶺葉
布衣猶帶舊京塵
穠寒難覓遊仙夢
路遠誰憐倦客貧
東望海門歸未得
北風吹雪滿唐巾

春酌

酒闌歌罷翠簾遮
月柳鶯啼子夜鴉
多少斷雲心上事
結成香夢是梨花

怯暖

怯暖新裁白苧衣
碁聲深院客來稀
春風無力晴絲軟
絆住楊花不肯飛

深春二首

夾泥花上燕巢邊
翠箔桑空蠶又眠
天氣乍晴風候別
坐看盆藕出雙錢

燕子來時春又休
暖風吹綠上枝頭
繡簾不隔荼蘼月
香影無人自入樓

采蓮曲

羅裙濺濕鬢雲偏搖落香風滿畫船
忽憶年來顛顛夢
鴛鴦正在藕花邊

春閨詞

桃吹紅雪上簾鉤楊柳風絲拂畫樓
日透闌干人病酒
賣花聲過懶梳頭

茅庭植上人

苔侵坐處石頭青滿屋春雲不用扃
入定醒來香印冷
一簾花雨濕殘經

喜涼

吹笛何人在小樓夜深不下玉簾鉤涼風敲落梧桐葉
片片飛來盡是秋

宿西上竺

閒收石上著殘棋山月無聲鶴睡時落葉打窓霜滿屋
有僧吟得夜零詩

水居

飛鷗貼水水連天一半青山半是煙日暮潮回漁父醉

不知船閣淺沙邊

斷橋春望

拾翠車閑輦路塵
山南山北杜鵑春
誰家庭院東風裡
吹出桃花不見人

湖上晚望

酒醒湖光生嫩涼
卧船吹笛藕花香
遊人盡逐鶯花去
一片閒情在夕陽

漁父吟

竹絲籃裏白魚肥
日落江頭換酒歸
只恐明朝風雪凍
老妻連夜補蓑衣

壽光宮

井氣蒸雲濕石欄
虬鬚道士自燒丹
開門風帶琴聲出
一陣松花滿醮壇

裁衣曲

燒罷心香午夜闌
玉纖輕捻剪刀寒
衣成恐不如郎意
獨試燈前照影看

花丁作字付葉招山使者

花蘚層層潤石牀
綠陰多處自生涼
閒將筆染荼蘼露
寫得春辭滿紙香

月洞書屋

自寫自詩黏壁上
何須古畫與名碑
隔牆風落閒花片
日日飛來入硯池

宋百家詩存卷三十九

欽定四庫全書

宋百家詩存卷四十

嘉善曹庭棟撰

滄洲集

羅公升字時翁吉州永豐人大父開禮為武岡教授
德祐間文丞相開督府於閩廣號召天下勤王兵辟
開禮知縣事授安撫使後兵敗被執不食死公升少
有才畧以軍功為本邑尉傷大父死節傾資北遊燕

趙與宋宗室趙孟榮諸公圖復宋祚知勢不可為經
錢塘江作弔胥濤賦以自寓滄洲集五卷須溪劉辰
翁為序詩抑鬱委折情辭悽愴亦難言之意多焉其
弟宗仁亦不仕元父死於寇廬墓哀泣不御酒肉者
七年蓋孝義萃一門云

新秋

團扇初辭暑虛檐恰受風簾花孤月冷秋在不聲中

臬

人誰獨無母汝母良可悲汝飽詎幾何亦有生子時

秋懷二首

錢塘八月潮勝絕間古今吳兒識潮耳不識潮中心
空庭下梧葉欲靜聞疎雨幽懷耿無寐隣客終夜語

謝松野叔惠菊

困粟分公瑾千金壽仲連山人不須此再拜菊花前

溪上

往歲貪竒覽今年遂考槃門前溪一髮我作五湖看

冬夜獨坐

庭幽蟄譚口燭盡輟書卷
牆外醉客喧堪憎更增羨

次韻槐姪送花

塵欺雙鬢少春寄一枝多
為報花神道晴天載酒過

絕句

吟膝從軍瘦生涯出仕空
山中破茅屋日日是秋風
天豈私貧我看書每自疑
寸心即知己不用世人知
羣盜田夫耳兵疲萬骨枯
千年干羽事只道聖人迂

水旱闕何事兵凶孰汝憐但尋師辟穀莫誤客求田
本是山林物中間一念差稻粱今懶種况乃種桃花

送歸使絕句

日斷歸帆急無身可得追親庭如有問依說鬢成絲
梁楚連天濶江湖接海浮故人相憶夜風雨定何州
魚鼈甘貽禍鷄豚飽自焚莫云鷗鷺瘦饒口不饒君
人問我何之我以此詩對雲飛百川流只在天地內

送介翁兄自揚州還南城

聲滿對松縣功成浮海船去隨騎鶴侶歸訪擊鱗仙馬
首吟情溢鴛屏別夢牽相思不憚暑計日話燈前

挽章

憶昔垂髫日相思志已深國家當日事父母此時心劫
火分南北秋風隔古今病軀可堪此無淚足沾襟

旅坐

負却征塵債飄零迄未休孤篷江貯夢深巷雨添愁山
色分濃澹禽聲互去留班超亦良苦萬里覓封侯

所聞

試問南來鴈何時戰馬閒古聞侵柳塞今見入梅關南
海潮方怒西江士不還淒涼廣州婦萬里沒燕山

秋望

遠樹嵐煙合孤村落照橫江從前日濁山似去年青
色鴨分去羈愁菴說成乾坤久蕭瑟消息聽鴻聲

嘗稻

楚稻中秋熟珠璣盃面浮已諳藜藿味敢作稻梁謀農

卷四十一
柴年年減官征日日稠憑誰寄焦飯少慰倚門憂

秋懷

舊日方山子淒涼寄一簞蟲聲來倦枕秋思入憑闌已
是肱三折那堪指一彈中宵更風雨誰念客羶寒

送劉玉田道判歸山

詩工窮鬼妒貌古俗人譏達士何榮辱閑官更是非面
無三已愠身帶一癯歸已試囊中法春田玉自肥

送同邸劉學古

入穀西山月驪駒幾屬行如君今又別令我苦為情白
入歸舟好菴憎客夢成梅邊會相見風樹莫離聲

東平府文廟規模頗壯其中亦有儒生十數然
無一可語者

當年鄒魯地弦誦久無聲刀筆迂顏閔章縫羨甲兵谷
陵朝暮改日月古今明歲晚高皇帝猶難致兩生

寄蕭高風

義氣凌秋日高懷巨海雲古人如取友天下獨逢君暑

退顏何似書疎夢却勤木瓜何以報明月為君分

世故

世故年年別人煙處處非詩從出山俗客已及門稀
凱入猶聞警場登更苦飢乾坤多事在未許製荷衣

辟地

雨急啼鴉切山昏去客奔竄身楚南極獨立鄭東門卜
處無神焰招餘有斷魂死生毫髮事不足累乾坤

得家問

乍喜平安報俄增放逐愁親闈萬里老客境四時秋意
往形空在詩成影自酬東風嚴瀨水不是欠扁舟
萬里平泉夢誰憐創業難已聞封樹伐敢惜賜書殘鷹
擊寧論飽烏棲不奈寒長平門下客知復幾任安

春日皇帝閣

蓬萊宮闕五雲端太液冰澌不敢寒須信帝家春事蚤
勾芒昨夜引春班

端午皇帝閣

化日舒長萬國陶南風古韻入絃高天心廣大乾坤小
添得神遊一兩遭

春日皇后閣

坤元布氣本無私載物功深世不知天上春回椒殿煖
春風纔入萬年枝

春日夫人閣

君王著意在經帷無復瓊林宴賞時從此六宮羞鬪草
碧紗窓下讀毛詩

端午夫人閣

黃金角黍照盤明
秋月弓彎鬪彩羸
應是君王方右武
內家仙子亦知兵

戍婦

夫戍關西妾在東
東西何處望相從
只應兩處秋宵夢
萬一關頭得暫逢

和官怨

竹葉垂黃雨露偏
羞緣買賦費金錢
有緣會有承恩日

莫遣蛾眉減去年

春晚

人在幽窗柳在欄樓頭杜宇一聲殘夢魂驚斷梨花月
寂寞五更風雨寒

客樓次韻軍中怨

白刃交飛接下樓却教騎馬逐吳鉤江南此去無消息
只聽鴻聲認妾愁

夢中作

絳橋孤嶽壓星斗
闌干回首乾坤小
不知金井晚月來
鶴弄一聲春夢曉

秋日有感

桂花無主亦清秋
蕎麥為誰先白頭
螢不照身常隱見
鷗無求世自沈浮

陵州

五月征裘路五千
長安疑在北辰邊
故園歸夢西風冷
明日陵州正覓船

有感

車騎將軍結束新長安那記昔年身南來盡是干名者
無復平陽下淚人

白溝河乃舊日南北分界之地

萬里封疆到白溝祖宗猶擬復幽州他年海島無歸處
誰解捐軀為國謀

旌德寺靜雲亭

巖壑幽幽竹樹青山泉鳴處省雲生蒼苔不沒摩崖字

留與遊人唾姓名

石間有賈
相題名

菩提寺

杭人火
奠之地

一畝方池幾劫灰
哭聲未了笑聲催
六橋煙柳相逢處
半是菩提拭淚來

觀潮

白馬揚波信有神
了知忠憤不緣身
潮頭却向西陵出
猶為君王擊越人

發湖州二首

秋色頻於客鬢加
歸期猶自歎無涯
行纏賸欠江湖債
未著袈裟已出家

彭蠡太湖三十驛
澄江如練憶元暉
他年雲海相逢處
還取苔溪一葉飛

靈巖寺二首

石門木老勢杈枒
曾見吳娃擁翠華
底事秦宮與唐苑
百年多屬梵王家

馬嵬錦鞞戰塵中
辱井空餘頸血紅
却是西施偏命好

國亡猶得嫁朱公

感懷

自緣舉世棄君平寧為尊鱸憶李鷹不識將軍何用揖
元非進士底須稱歸蕪城郭渾如鶴只欠袈裟便是僧
書冊至今成冀土夜窗猶對短檠燈

見遠亭次韻

望中無處覓塵囂只有詩人渡石橋萬里龍鱗歸雪屋
千山羊角下風條斜陽盡處青山小飛鳥行中碧樹遙

更把新吟作三絕不妨東國使人描

故相府

擎天力盡午橋休狐舞中庭草塞樓鐵騎竟侵司馬宅
金椎誰報子房仇事闕氣數英雄老位易乾坤史冊羞
故舊淒涼幾人在羊曇無淚到西州

湖山人隱居

幽人不管興亡事贏得三年只下簾居介兩山今李愿
園開三徑古陶潛傳家書已為兒計種秫田應為客添

要與山神結緣去一邱分我卜茅檐

代前清江守滕大著巖瞻贈李吉州才

福星又見出虛危螺浦千山亦展眉八邑命懸循吏傳
萬家春在道州詩旌旗已變河陽色布粟猶憐蔡土飢
只恐九天歸詔急去思還似鳳洲時

九日書懷

木落湖山萬葉黃亂愁深處見重陽
絺衣只惜詩人體酒盞全乖病客腸
只道事隨人意改如何花作舊時香

孤樓不作還家夢，卧聽松風響夜長。

蛾眉亭

蛾眉亭在牛渚磯上，大江分流環湍而過，太平無為和州三城皆在目睫，江行

絕景也喜而賦此

萬里風濤競擊，撞乾坤設險，鍵南邦五更畫角。三州夢
兩岸青山四面窓，太白風流空舊月。虞公勲業自長江，
倚闌何物堪持玩。萬頃長江鷺一雙。

洞巖

閩太守得道之所

但見佳山便合登，不須憑幻說。超昇崢嶸神禹疏，河勢

鎗鞞軒皇奏樂聲已有道人稱吏隱應無處士樂巖耕
近來太守君知否只記西園是玉京

贈劉次山

片雲相望不相識萬里相思首重回剡曲正須安道見
高陽真為朗陵來天分瑞葉供吟料春遣梅花侑酒杯
安得受屨成二老日陪杖履說敲推

別次山館中諸客

德星光照斗牛野我亦沙鷗尾鳳鸞聚首自憐吾輩在

畫眉莫與世人看正平幸作忘年好靈運那知入社難
明日回頭別羣玉亂山何處兀孤鞍

山背道中

是間定可著吾家流水深林一逕斜天下獨清惟雪色
客中舊識是梅花妍媸顛倒驚時事戰伐紛紜老歲華
風雨窮山為誰苦故人何處岼烏紗

雪後望廬山

一別爐峰十載餘重來相對雪消初湖中怒長陽侯氣

林外光生佛子廬，鼎鑊夢回山屐在。
塵埃業重草堂疎，
惓惓未副登臨願。終擬誅茅賦卜居。

庾樓

在江州九
江門城上

萬里淮山萬里江，庾公曾此據胡牀。
西風塵土謀誠誤，故國關河念未亡。
對策記談乘塞事，倚欄今送入京航。
六朝人物知多少，只有東籬百歲香。

九日

客樓坐閱帝居移，強賦愁邊九日詩。
稱壽無從辜菊把，

避裁何處愧茶枝興如陷賊藍田日吟到聞兵漢地時
萬里朔風將夢去故園鷗鷺訴相思

再如吳門

地凍江空鴈不飛孤帆何事又乘危更無殘雪山陰興
漫有窮冬蜀道詩自笑大瓢長濩落可辭群鳥議瑕玼
吳門市隱非梁籍名姓寧須假子知

過嘉興雪中

天末雄風卷白波玉舟既曉泛銀河不知瑞入耕疇未

但覺寒生客路多
四海儘寬胡至此
一邱無分欲如何
只因歲晚嘉禾道
賸要先生賦七歌

擬過錢塘約諸客同賦

去者勿戚戚來者勿赫赫
天地猶乘除萬古晨有夕
詎知今時今不作異時
昔吳山越山青舊日錢王宅

謝松野叔贈詩用首句
驚舟出瞿塘還有平流

安十字為韻

存二

庭中烏鵲噪門外
鷄犬驚知有錦繡章
來作金石聲松

因屈子恥菊為淵明清今我獨何者照几新詩明
君字若修竹瀟灑風雨秋君詩若輕帆滄海萬斛舟快
讀意自醒痼疾一劑瘳細讀殊味益汲井百丈幽

入書室東垣有神光自几案出二首

江海東南瀉日月西北傾天地豈不仁作此大不平遂
使宇宙內千載挈甲兵人間勿設險設險招戰爭
征鴻且勿飛我憑問長安長安在何許征鴻亦良難世
狹日月短氣縮天地慳春色豈不深風雨猶晚寒

秋懷

日月從東來幽窗光炯炯
踈窻一尺許寫我肩與頂可
憐窗下心愧此窻上影

秋夕

客散燭亦盡明月共寂寥
三生東華夢歲晚依僧寮
秋宵豈不涼客心自如燒
循檐耿無寐顧影自蕭蕭

道傍古樟有竹附焉可發一歎

古樟蟠山間垂蔭翳我里
歲久或反常村童祭為鬼
大

穴藏精靈小隙竄蛇虺嘗聞有驚霆掣抉破根抵竹我
君子徒冰霜凜在齒胡為事鑽刺蝓屈嵌巖裡乾坤亦
廣大朽木為足恃托身一失所萬水難復洗松梅各相
弔為我二友恥去去非吾徒偷生不如死

憶故人

檐前一矯首雲凍天欲愁客心急歲晚留滯此何州黃
金不療飢煖老各一裘珍重山中人幅巾自無憂

西樓火

祝融下省方掉鞭鞭火龍夜行失故路誤入書窓中紅
光拂斗極幻出琉璃宮魚龍沸幽壑臺觀遊太空六丁
攝圖史羽化茫無蹤成毀有定理那足介我胸造物解
相補放入山數重此境如此心空洞無垣墉

脫身軍府暫憩先月亭前挹湖光左右花木交
映壁間題字亦有可觀惜未及見月也

四年塵沙中奔走日不給空歌下泉詩頗愧夔子集今
晨出軍府心與歸鳥急花迎曉日笑樹沐清露濕清漪

舞游鱗照影孤小立重來期秋風領畧蟾影入

抵舍一夕復行途中遣懷

乾坤本無邊我命自荆棘去住風濤中生死無消息
茲晨夢中歸真幻竟莫測形聲各已改老稚不我識一燈
話清涼喜極淚始滴出門動經年還合甫浹昔云胡作
驚鷗又復告行役雨聲扶離思春晚作秋色暮山試回
首上有雲氣白天長眼力短此意幾悽惻

觀碁

秋風動江皋吹落鷗露影先生江湖心收作目中景庭
深樹陰好門掩禽語靜一聲寂寞中恍若隔人境胸中
兵十萬臨敵暇且整歛之塞成皋縱去舉鄢郢僕方棲
會稽蹇足未得騁中原倘相逢亦有憑軾請

看書有感

齟齬趨庭日真期萬里程開編十行下刻燭五言成頗
笑阿時學方懷覽古情祇言如昨日不悟已前生客裡
餘長缺忙中負短檠舊言如遠客新卷即生兵文武終

何執行藏兩未明空餘清夜夢時作讀書聲

秋懷

歸輿穿翠微夜久樹益蒼海蟾浴清波吐此林表光今
宵衣上露明日履下霜兒童不知此且喜今夕涼風林
忽響答似識子心腸

蚤行

殘月不肯吐鄰鷄殊未鳴已驚火星沒况值元雲生居
人酣春夢行客貪修程衆愁春露冷我喜旦氣清小立

著定眼自覺歸路明

感舊

逝水日已遠愈覺別恨重歲月不可留又已聞鳴蜩故
衣餘手澤見肘未忍縫遙知春去後飛花散無蹤遊魂
定何依馬蹄隔千峰誰與持麥飯一灑冢上松憑高酬
觴酒聊以寫我胸彭殤同所歸百歲還相逢但留一寸
心不愧三尺封

戲蕭高風曾孟聲二友二首

丹鳳辭舊樓四海求其凰偶來梧竹間振翮鳴朝陽衆禽不自揣競欲依餘光神物要自珍微羽那足當了知霄漢姿不集灌莽場所憂燕雀雜坐更鴻鵠藏丹山有佳侶足以陪雙翔人間勿為留歸哉白雲鄉

飛鴻響遙空抱弋空遺影游鱗縱前川把釣睨枯井相看各如夢欲去幾延頸勞心絳有獲所獲僅鼃鼃行人見之笑干喚不一省滄溟四無邊盡納天地境巨鼃載三山未足污吾屐相顧作清遊濯足壺峯頂

秋夜有懷

今夕涼已透開陽月初生
忽思會心友譚峰隔江城
是非天意高寵辱人事驚
衆賓亦笑語我獨難為情
回風避老樹中宵有餘聲

稍稍暝色添悠悠遠山縮
秋聲何方起餘韻入修竹
興來不知癡橋外一筇獨
燈光小市關人語深院肅
惟應有歸雲肯向檐下宿

散慵

散慵陟嵐嶺恰與落日平天秋萬宇淡盡見山水情遙
煙破衆寂危花疑月明川原自瀟灑衣袂皆風聲鑿空
識本性憑高失平生蒼然暮色合興盡心復驚

曉起

危柯蚤得秋羈鶴易知曉幽人帶星起古木叫孤鳥簾
影一丈高曙色萬里杳人稀蒼茫內樹色浩蕩表安知
南征雲不自厭紛擾秋光接巖氣終覺風味少紅於木
芙蓉麗白惜渚蓮天觀妄眼已空觸物思還悄賀公豈真

狂有激或成矯歸登神聖臺一笑萬緣了

蚤起

鬢鬢五更動容子推枕起餘燈明壁間照我髮垂耳呻
吟與鼻息徹曉聲未已誰言吳越異疾痛切吾體向來
參內篇久已一生死區區窮通者未足置愠喜渠方怒
張髯我亦笑彈指珍重青原山歲晚吾與爾

夜月懷超然故臺

中宵雨聲歇好月滿我屋開門四無人老樹立於獨巡

檐不成寐送影過牆竹賞弄情未央矮屋礙遠目故山
有層臺千里曠遊矚主人三年別坐使萬瓦覆鵬程本
逍遙蟻穴自羈束乾坤有興廢豈必善者福是身且非
我而况土與木但聽雍門彈忽效孟嘗哭

冬至

窮冬乃常燠庭礎上雲氣索居共誰語煮藥作冬至客
來寄枯碁客去玩竒字是中即了我自得在不智偷生
輕日月長短亦何計惟應開闢事頗得大易意門前鳴

騶急窓外飛雨細雲物吾不知曉枕一覺睡

從軍留別天逸

一聞五千日功德高於山如何天不借驅向金草間妖
血醒人飢馬足愁險艱今宵鵲詠處已帶風雪顏皇穹
未厭亂肯放兩脚閒東海遡山湖廬峰定天關即往不
可留我去何當還後夜夢君時哀笳鬢成班

從軍興平

廢墟起寒煙飢鼠意自安十年行脚處重到無一可乾

坤鍾阮會推擇乃及我東臬雨犁手長戟三歲荷治絲
慙益焚杯水不救火窮山高馬齒華屋實野果平生疎
嬾報歲晚困羈鎖有如醉行人日暮路益左未湏說神
仙大福在無禍但當求蒲團不復夢城坐

從道益聲自清江送至樟鎮別後書懷

故人難合并貪路惜羈旅孤蓬遠追送未怯危浪阻當
年滕王城跌宕欣得侶朱顏悔華髮笑口失愁緒那知
更世故俠客變處女西風淒破帽細雨雜參語羽書雖

云急飛箏未忍去嗟予百憂集俯仰輒齟齬蕭然一匏
笠四海莫我處斷崖揮手處別意寫雙觴夜闌江樹搖
尚想客凝佇

有念

方招東渚魂又送北阡窻交遊亦餘幾日覺眼中欠向
來所憎者一一皆可念憂愁鬢先霜形影吾自厭春華
已零落秋木豈陽艷緬懷郢人質徒挂季子劍

喜雨

三更飽甘雨，倏然涼意秋。
驚霆駕風至，氣欲掀我樓。
溟濛劃軒豁，稻隴如潑油。
兵凶歲相仍，糟糠甚珍羞。
天公一反手，少緩帶犢謀。
諸賢自蒿目，百畝真吾憂。

納涼

氣至暑固當，境寂涼自生。
天河白如水，夜久山更明。
古樹有莊色，新泉入幽聽。
逃空空快事，喪虎不可停。
飛螢過屋頂，一落如流星。

冬蚊

冬夜乃常燠蚊鳴猶薨薨客枕本無寐驅除困揮肱向
來炎歎中意氣莫敢膺羣飛乘幽陰各以齧自矜詩臞
肉幾何磨吮恐不勝霜風日以勁利皆那可憑奈何逞
餘毒糜爛意未懲先生忽睡著汝亦終何能

丹房采薇

神丹有餘光入地茁紫玉氣鍾仙掌清味壓婦臂俗東
風一夜雨登俎間紅綠澹美意自古酸蘊香更酷山人
謝肉食藉為慰便腹薦新先北堂誇示及小陸府公厭

腥腐寧有啖此福所以首陽翁不復次周粟

種藥

治生吾未能學圃計不惡秋風雨如酥畦土樹靈藥荒
茨出神竒高下繁花萼將期清百慮豈獨健雙脚平生
林下心五鼎視藜藿常疑種玉誕亦笑帶經錯黃金汚
吾鉏矧肯白晝攫歸還勞酒卮辛苦同為樂

柳塘外集

僧道璨字無文寶慶時人住饒州薦福寺旋住開元

寺後復還薦福能詩格調清迥直入陳黃之室廁之
江西派中亦可獨當一面有柳塘外集詩二卷柳塘
屬豫章漢昌邑地多陶姓皆五柳先生之後道璨亦
其裔也故以柳塘自名集云

水月軒

江水清無底江月明如洗開軒挹清明道人心若此春
風不搖江面波春雲不戴江頭雨天地無塵夜未央照
影軒中惟自許我來風雨夜漫漫水月俱忘無表裡笑

倚闌干問阿師水在月分月在水

題物初蕙蘭

花短秋意長神清顏色少筆端有西風國香來未了

仙巢海棠祠

領客坐花陰飲客酌花露先坐自家春八荒一牖戶
其望前修一枝閱世故鶴車來不來東風吹日暮

野水橫舟

望之一葉輕即之萬鈞重大風吹不去世波搖不動送

盡千帆飛濟川已無夢月冷蘋花秋此興白鷗共

月窟

鑿開混沌竅豁見天地根舉瓢酌桂漿引足踏崑崙湛
然一精明身外無乾坤我欲從之遊雲深入無門

以上三題為徐竹堂賦

題源虛叟廬山行卷

胸中有廬山筆下有廬山窓下有廬山眼中有廬山別
山十七年見山一日間韻險落鬼胆語妙破天慳永懷

金少曰 卷四十一
看山人恨不同躋攀摩挲青石硯負山良厚顏天風幾
時來乘之欲西還

題於潛西菩兼山閣口參寥受業

青山在屋頭易見亦難識如玉有寶氣如土有正色平
生萬里眼付此千丈壁雲行山欲動雲疑山更碧動止
同一機兼處貴自得心外無青山身外無周易安得識
上人倚欄論未盡

喜雨呈梅石趙都大

久旱天地焦酷出秦法外一雨中夜來漢兵起豐沛萬
物皆吐氣昭蘇脫阮會憂國有夫人愛民如子輩心香
徹九關化為雲鬢韃生意一萬里直在方寸內老農相
與言曉晴坐牛背

和梅邊汪提幹

我夢稽山陰茂林映修竹鑑湖八百里眼者不盈掬管
領天地清此樂梅邊獨幾欲驅車去雲根夜同宿山空
秋月明安期未可卜蓬萊水清淺褰裳同往復徑謁蔡

少霞不待青童覆共草新宮銘調高語圓熟

和童敬重

空山木葉下坐觀不二門茶香舌本甘直探天地根兩
袖江海風眼前見夫君十年戎馬閒未廢詩與文逐祿
士之常一廉減萬想六經在日用論說謾深廣躬行能
尺寸光焰長萬丈世彼易溺人外此無保障

潛上人求題菊山

具郎號菊山秀色已衰朽潛郎號菊山清香滿襟袖天

地一東籬萬古一重九絕愛陶淵明攬之不盈手後人
不識秋多向籬邊守燦燦萬黃金把玩豈長久西風容
易老回首已如帚因潛憶具郎有淚如苦酒

送愿上人過雪竇兼呈弁山

去年無準死今年癡總喪二老百世師一去空天壤玉
磬與天球滿耳皆新響堂堂萬鍾鼎橫列乳峯上愿也
天台來雙眉擁青嶂要見乳峰人不作行役相碧樹明
秋花吹香山藤杖長松四十圍懸水一千丈到門相見

時為我問無恙

山泉園中有雪菊盛雪乃開今歲雪止再作猶未開也山泉有詩次其韻

大雪凍不死秋風吹不開許大天地間受得一氣歎生意在根本肯遜陽和回要從梅兄遊一笑霜雪堆六花已飛舞槁悴如根荻下有反魂香英英死不推老仙造化手妙處能奪胎喚醒萬黃金桃李皆奴儕對花酌老仙高致誰能陪東籬有佳人萬夢招不來

坐圓常汪天軒缺謀缺西江示衆語

三洲相接連斷處直如割中洲二十里平沙淨如刷雲
開天四垂雨晴山一抹綠波三萬頃乞與漁翁撥納之
窻戶間道人巧點綴我來不忍去倚欄腕欲脫草青煙
冉冉柳靜浪聒聒天風駕滄海奔突不可遏欣然見此
翁句險眼能活潮流欲從之水深春岾濶

紀夢

我不識靈溪夢向溪邊去溪遠屋頭流橋通溪上路軒

窗面水開水清魚可數煮茶僧請詩茶香竹當戶花箋
暈淺紅霜毫脫毛兔引筆信手書波峭含韻度置筆喜
語客眼明失沈痼夢覺秋滿房殘月挂庭樹病眩二十
年萬花舞深霧夢中能楷書以我心念故人生孰非夢
百年等是寓便欲驅車去傍溪縛茅住但恐秋雨來溪
深不可渡

踏雪下雲居山宿崇壽寄草堂

別山三十年見山雙眼碧山靈喜我來一笑作戲劇縱

橫萬花舞變亂山顏色圭壁拔地起自在群玉國去興
紛莫留下足深沒膝凍合披長短石礙路敲側躋攀脚
未穩失勢落數尺平生江海履常患天地窄立處貴穩
實取道貴正直只要緩步行不在多用力祇以到為期
半塗肯休息須臾到山趾坦途隨意適回看行路處倚
天立青壁極愛山上雲長年抱幽石耐得許多清一夜
遙相憶

送誠上人

長安城頭秋日黃長安道上秋日涼遊子念親從定起
一衲卷雲歸故鄉七月八月吳楚路十里五里東南疆
遙知子母相見處籬落黃花吹晚香我母今年六十四
千丈白髮應蒼浪石田茅屋歸未得西山幾度明斜陽
因送君行發深省天地濶遠愁茫茫他年相尋君勿忘
楊柳當門水滿塘

題善住閣

閣前溪水聲潺湲閣外山色空巒岵取之不得舍不得

善住道人如是觀浩蕩春風滿天地飛絮遊絲無定處
去無所至來無踪善住道人如是住有所住兮成守株
魚止藻兮舟楫蘆無所住兮成漫浪空中迹兮鏡中像
道人一笑燦琳琅住不住兮吾已忘閒倚欄干春晝長
眼者白鳥浮滄浪

題和山推篷者梅圖

沙頭寒聲入蘆葦沙際暝煙濕微雨疎花明在樹梢頭
吟身卧在船篷底相省一笑大江橫魚鳥不飛天似水

逃禪英骨悶九原楮郎有神呼得起
倔强橫枝不受屈
玲瓏孤標淨如洗
春風滿面吹不開
冰雪滿身凍不死
歲寒心事誰得知
大似和山隱
君子我有扁舟蓑笠盟
落在吳頭并楚尾
挑燈今夜不成眠
免得相尋來夢裡

賦張寺丞樗寮

樗寮先生千載士
草木有誰同
臭味外無刀斧斲削痕
中有冰霜不老氣
紅紫紛紛滿上林
我自無心趁桃李
蘇秦張儀自縱橫
寵辱不驚魯連氏
梁棟峨峨入阿閣

我自無心為杞梓，杜喬李固自黨錮。網羅不及徐孺子，
故家喬木百世陰。有此孫枝能蔽芾，落去英萃植本根。
深培不朽聖賢事，犧尊青黃互翻覆。眼省世事如醒醉，
願言善保丘壑姿，留取清風在天地。

樗寮生日

長庚流輝千丈彊，斗南夜氣浮耿光。晉唐以前舊人物，
翩然乘風下大荒。平生厭官不愛做，自歌招隱山中住。
後園明月手自鉏，多種山前老梅樹。歲寒心事梅花清。

蒼浪白髮梅花明有時指花對客道此是我家難弟兄
上國春風醉桃李過眼絲絲付流水禁得清寒耐後霜
幽獨何曾有如許今年枝閒著子無黃金作顆應纍纍
相見日長庭院靜時時遠枝如哺雛摘來不用供調鼎
且喚麴生相管領等閒一醉一千年莫遣東風吹酒醒

和余山南僉判清溪觀荷

東風已老南風急浪蕊浮花和露泣翠袖盈盈波上來
相向美人如玉立軒渠一笑俱動容彼此一樣冰霜蹤

明珠散不論斛斗清溪化作驪龍宮大江以東北山北
時樣新妝皆失色古心一寸誰得知江上晚來數峰碧
晉天之下率土濱容著不盡胸中春濂溪愛花我愛葉
難將此意輕語人探尋勝處到深杳兩眼眈眈天地小
不離枝葉見花實紅白紛紛跡如掃滕閉不著無弦琴
酒中清濁時自斟興寄超然八荒內身在水流香世界
綠雲冉冉撥不開陸地可生能時大中通外直真絕奇
一語能覺千古迷二百年後誰傳衣清溪滾滾通濂溪

陪山泉登芝山和文正公舊韻

培樓視崔巍眼高如許哉
舉頭天在上四面景皆來
漸老成多病看山又一回
盡供詩世界霽色為君開

和吳山泉知府

亂來誰訪古杖履竹邊聞
小立真堪畫閒譚亦自文
長翁千載語中允百年墳
寂寞廬山路幽尋獨有君

和馮叔炎梅桂

風露透枝葉團團翠滿坡
但教秋思足不必月明多
騷

在誰招隱山空自放歌故家射科午折取莫蹉跎

和致軒

眉睫功名氣筆端天地春孰知心念善祇與聖賢親味
澹有真樂眼高無古人金鑿行夜直坐聽漏聲頻

致軒趙使君領客及子姪入山即事次韻

戴家湖上寺近市有山林雨足四郊潤雲低盡日陰竹
疎和翠減松老受春深留得行窩住樓頭午漏沈

上安晚鄭丞相

相國歸來卧舊山功名雖好不如閒向來北望中原眼
送在滄波白鳥間

清於獨鶴瘦於梅小袖長衫晉樣裁推出柴車人共指
前身曾住洛中來

迎晦靜湯先生

向來九虎守天關已是無心便出山手裏春風閒不得
又攜桃李種人間

題水墨草蟲

蜻蛉低傍豆花飛
絡緯無聲抱竹枝
憶得西湖煙雨裏
小園清曉獨行時

過桃花寺懷東叟

主人去後客來過
丹竈重重鎖薜蘿
滿院碧桃花寂寞
春風不似舊時多

過舅氏宅

墻頭楊柳老無枝
門外新泥淤舊泥
因看兒童騎竹馬
憶曾隨母北歸時

超師房

巖桂花開滿院香
青莎葉底有鳴蜩
人家只在西林住
鷄犬聲中又夕陽

寄題高大清東村

浮花浪蕊易飄零
有著桑麻眼便青
荷鋪歸來春晝永
案頭重讀相牛經

和吳山泉萬竹亭

風流不減晉諸賢
冰雪精神已凜然
歲晚莫教枝葉盛

聽他明月下青天

和恕齋濂溪書院

洙泗淵源水一溪
蘚花綠遍考亭碑
白雲散盡青山出
一卷通書未寫時

讀陸雲西志
供定城墓有感書呈子勉總幹
一艇東來公已仙
午天花柳為誰妍
深培根本存生意
把握春風有阿連

紅梅

姑射真人笑臉開
肯將顏色浣香腮
仙遊曾向桃源過
引得春風上面來

懷舊業

雲滿空階書滿牀
開門對面是清江
多時不省梅花影
閉却中庭月一窻

西湖除夜

又來上國看新元
細嚼梅花咽冷泉
阿母在家年六十
孤兒為客路三千
身居東海滄波上
心在西山落照邊

碧戶朱門楊柳岬不知歸日是何年

和恕齋吳提刑秋陽菴居

截斷人間名利塵橫塘深碧護新墳昏明不定霜天月
開合無心竹屋雲風雨對牀差可喜乾坤萬事不堪聞
栽松種竹閑功課却為憂時一半分

賀恕齋除兵部侍郎

面無老色氣精明南海歸來住未成不道山中無宰相
要從世上做功名雲屯萬騎西風急月浸三邊夜柝清

謀國定知有長算缺 雖不樹向南旌

和謝君澤題弋陽桃花寺並弔鄭盤翁

一曲清溪十二欄分明常在畫中安
千年藥竈和雲煖
五色丹光奪夜寒
魂此不來懷石友
山居能久是無官
葛翁顏色紅如染不信桃花樹上春

和南屏湯司戶

夜窗燈火共論心
喜動眉鬚不自禁
嶺海五年雙鬢短
乾坤萬事一杯深
肝腸疾惡言多直
懷抱傷時老易侵

歸路江梅花正發書來定寄短長吟

和雲壑吳衡州

紛紛世事幾昏明作計還山又未成
欲學種松消永日不徒煨芋博虛名
雲開衡岳鵬程濶秋入鄱湖鴈影清
也欲摩挲病未眼春風煖處望前旌

和傅處厚

翰墨風流已可人文章不敵五窮靈
路當盡處山方好花到開時葉自零
欺我儘教雙鬢短知心幸有一燈青

柴門莫放閒雲入付與春風自在扃

余疇昔之夜夢與樗翁共坐南窗翁出所作詩
字韻詩索和及覺能記前六句續之成章

輕雲卷雨過簷牙楊柳池塘噪亂蛙四壁月華春夜永
一年風物此時佳詩當澹處工差進心到平時語不誇
睡眠醒來人不見杏花散影滿窗紗

采芝集

僧斯植字建中號芳庭武林人理宗時以詩稱初住

南嶽寺旋投單四方相識者盡一時文人如靜佳朱
繼芳勿齋熊銖俱為酬倡遊方幾二十年晚歲住天
竺別築邃室曰水石山居吟詠於中有采芝集一卷
又續集一卷寶祐丙辰自為跋云詩志也樂於性情
而已近於覽卷之暇心忘他用得數篇目曰續藁然
不可謂之無為也其詩雅鍊深穩脫去禪家落套語
不媿風雅之目

金陵道中

望遠生愁思，淒涼處處同。
青山迷舊冢，芳草蔽閒宮。
雨過城樓月，潮回鼓角風。
十年懷古恨，多在六朝中。

喜人歸幽棲

霄漢分攜久，吟懷思欲迷。
相逢春草外，歸隱石房西。
澗急禽聲少，松搖月影低。
要知人靜夜，猶自怯猿啼。

水石山居

靜極青山裏，松花滿石牀。
春風思華嶽，夜雨夢瀟湘。
雲影歸林薄，猿聲出澗長。
心知無別事，從此閉閒房。

江村晚望

何處問歸程
蒼茫入句清
雲生峰頂白
月近水邊明
芳草迷平楚
晴樓出遠城
此身南北外
漁火是閒情

登雲漢閣

高閣勢凌虛
天涯入望微
雲藏山鳥影
春滿野人衣
積雨催花盡
寒樵背日歸
焚香端坐處
似覺世塵稀

暮春感懷呈勿齋提舉

浮世事非真
吟多白髮新
自居京寺久
夢到石橋頻
日

落煙生樹花殘草自春坐省今夜月應與舊房隣

寄梅叟法師

一從飛錫後迢遞各天涯春事隨流水行人間落花住
當南嶽寺門對赤城霞遙憶焚香處松高月影斜

金陵懷古

天津橋上望如在玉門關月過東西浦江分遠近山淒
涼三尺墓興廢六朝間千古登臨地寒潮自往還

送覺上人

送君千里去又見落花飛水國今宵別天涯隔歲歸岼
遙春樹密灘小夕陽微後夜扁舟月應逢宿鳥稀

訪故人

石榻相期久閒尋到野房春歸芳草暗雲入楚山長人
影分孤驛鷄聲落曙桑淒涼千古事回首兩茫茫

寄深居馮發管

相懷千里外空望極遙天處世惟今日看花憶去年春
風生島樹夜月滿漁船此後閒尋處應須借榻眠

旅中寄故人

世故長安裏三年別釣磯只因吟事僻幸免識人非性
拙趨時少家貧過客稀春風歸去日同采故山薇

西園卽事

一徑落花紅迴廊復舊踪千峰遙隔水萬木遠含空沙
鳥晴雲外寒帆夕照中幾宵曾宿此江月夜相逢

旅中偶成

風吹客袖寒飄泊在長安對雨春題盡看雲夜坐殘遠

山平楚水蒼漢接吳灘
遠憶天台寺相携去不難

懷芳林處士

相思不可見江路正迢迢
煙樹同吟遠關河入望遙
晝長花影轉風定篆香消
遠憶君居處鐘聲隔暮潮

送靈曜之姑蘇

一身惟在道清苦獨知君
世路終成別山光不共分
曉天寒欲雨春樹野生雲
此去他鄉寺猿聲各自聞

偶成

東風玉勒馬蹄輕多少遊人上鳳城燕子不來春寂寞
海棠花發近清明

山家

一溪流水遶煙霞路入青松第幾家蝴蝶傍人飛不去
隔牆開盡碧桃花

晚來

晚來無語立東風一片閒情在碧空人老杜鵑渾不管
柳花飛盡夕陽紅

西湖晚望

久雨初晴睡正長
春蛙鳴徧舊池塘
小亭寂寞斜陽裡
一陣東風過木香

堤上

楊柳垂絲拂畫船
杏花零落斷橋邊
半山煙雨東風惡
更向西亭聽杜鵑

夏夕雨

滿林鐘磬夜偏長
古鼎閒焚柏子香
石榻未成芳草夢

西風吹雨過池塘

清華夜坐

開盡黃花滿短籬
靜聽隣屋夜敲碁
清華池上一更月
僧立松邊未有詩

山居

晚策登臨日欲斜
小溪流水是生涯
道人睡起鶴飛去
開盡青松一樹花

春夜

玉樓臺畔柳生煙
况是春風杜宇天
一片月光涼似水
半扶花影上鞦韆

古樂府

携君石上琴
彈我窗前月
月缺又還圓
誰能免離別
青山叫子規
行人淚如雨
子規不肯歸
行人不能去
欲買米菱船
野水無人識
野水去不回
迢迢暮山碧
晚步入山陰
斂霽人影絕
惟聞太古音
聽之心膽裂

寄衣曲

自君之去矣欲寄征衣淚如雨征衣未寄心已悲一寸
相思隔千里湘江水是巫山雲巫山雲是湘江水湘江
西岼芳草深湘江日夜多行人行人去去天之涯門對
落花三兩家家有酒謳且歌醉來月下彈琵琶

賦老将和官字韻

獵獵征旗促曉寒幾回臨陣練兵官黃沙滿塞黃雲暗
白馬嘶風白日寒漢語肯隨蠻地改戰袍猶帶血腥乾
如今韜畧渾無用瘦骨蕭條甲冑寬

挽周彥良

白首功成未十年，寡妻相弔泣江干。
詩名似水聲還遠，世事如雲夢已殘。
楊柳滿堤人去後，海棠深巷雨初乾。
東風忽起青山淚，雖有君書不忍看。

蘭谷

空谷寄深雲，靈根自不群。
地閒青草長，香遠隔溪聞。
靜與騷人佩，清同楚客分。
惟應千載後，餘韻在湘濱。

多福寺

野鹿自成羣山中少隱君鐘聲兩寺合人語一溪分泉
響松間雨苔生石上紋多年僧住此半榻鎖閒雲

與子入山來

與子入山來永夜不得睡但聞松子聲敲落梧桐樹月
到窓愈明秋風瀉流水古琴三兩弦知音不知處惟有
白面猿閒中自來去

寄勿齋提舉

滿林煙樹已紛紛溪上猿聲不共聞惟有青天半庭月

夜深應與故人分

門柳

看盡門前柳愁多白髮新
灞橋風雨夜離別是何人

遠山

萬里色蒼然春煙夕照邊
舊過南嶽寺曾向雨中看

石城秋夜

漠漠青山水自流西風煙樹幾
經秋舊時歌舞人遊地
月滿江城十二樓

春日同友人遊湖上

十里湖邊路垂楊映馬蹄
水光平野濶山影遶樓低
夜雨生青草春風濕紫泥
興來無限意同此片時題

邊城客思

客裡厭芳塵淒涼又問津
向南人去遠歸北馬嘶頻
野水荒城暮孤舟海樹春
故鄉非久別已覺鬢毛新

過越

渺渺天涯路扁舟去不窮
水花隨岫盡山影落江空
往

事千年夢漁歌一夜風詩成惟有月清致與誰同

天竺山居

對雨吟方穩西風忽晚晴
野花沿澗白秋意入簾清
淺水藏魚影重林隔磬聲
是非塵外事誰可斷高名

故宮懷古

暮天雲盡遠山空
夜夜西風入漢宮
鐵笛一聲千古恨
月明人在女牆中

落葉詞

片片飛來總是秋更於何處復添愁自憐枝上無收管
却帶殷勤出御溝

暮春雨中感懷

回首郡城東春殘碧樹中落花千點恨疎雨一簾風白
雪侵新鬢歸心逐斷紅茫茫事如此何必怨塗窮

江寺晚眺

盡日無多事閒行一徑陰人歸秋寺晚月滿夜堂深
海濶頻生霧城荒遠見林青山與華髮空愧百年心

照影

性與兒童異，蹉跎二十年。照來池上影，恰是未生前。

聞子規

十年已起故鄉情，客裏淒涼不耐聽。啼到蜀天空有恨，水流依舊月還明。

宿雲山房

縹緲沈虛碧，清池見宿雲。松聲臨石斷，水影與泉分。芳草經年夢，幽禽隔徑聞。倚闌吟未盡，紅日又將曛。

老去

老去厭芳菲思歸未得歸夕陽溪上樹花作去年飛

苕溪舟次

扁舟煙重冷漁蓑兩岼人家浸小河芳草自生春自老
落花隨雨晚風多

送故人之江東

鳳城花氣浥旌旗又見春風上馬時不是灞陵難話別
垂楊空作去年枝

清明

隄上尋春步較遲
馬嘶芳草燕差池
南樓煙雨清明日
正是佳人墮淚時

江淮傷感

水流花片濕輕紅
多少英雄逐曉風
三百餘年歌管地
數聲歡怨不相同

以下續藁

送敏上人歸永嘉

風光苦變遷客裏對殘年別我此時路問卿何處船斷
雲連雨雪落日遠人煙又向龍湫畔開扉近瀑泉

上竺寺

古寺寒橋路鐘聲靜忽聞數峯平處合一水衆溪分老
樹煙蘿雨殘燈石塔雲閒心寄幽寂似覺遠情氛

山中即事

千峰當此境誰可共登臨月過秋池靜雲歸古木深
觀前去事已悟未來心更欲尋詩伴相携向石林

對梅寄人

欲問江梅信吟筇帶晚霞笑看今日樹開過幾年花疎
影生來瘦寒枝折處斜要教人寄遠何地是吾家

春日

人生厭別離老去更何為獨對清明雨閒吟社日詩野
蜂成密蚤海燕入簾遲未盡尋春興應須愧後期

送人之吳

無心學隱淪此去向吳津千古是非地一燈煙雨村烽

塵憐楚戍榆柳隔淮春別後新吟句何人可共論

題天竺巖樓山房

一室寄雲隈憑欄日幾回無風山自雨有主燕還來野
徑通樵遠巖花向晚開舊時題素壁今已半蒼苔

丁巳燈夕前一日觀抱拙寄敏齋韻因事有感

走筆以賦

萍跡倚春風春光苦未濃人間連日事城外一宵鐘遠
鴈書難寄殘碑字已封幽人住城市清夢兩三重

送隱士遊京淮

送君湖柳下未別已關情古塞去程遠寒江入夢清野
雲低水樹山雨閉春城到處逢知己虛傳隱姓名

山居遣興

山寺閑修竹偏宜靜者居觀空心已悟集理事常虛日
月供吟筆乾坤入草廬何如釣臺叟得計在樵漁

登吳山

嵯峨宮樹靄晴空吳越迢迢一望中幾處笙歌人遠近

金定正屋全言
卷四十一
萬重花柳路西東風生簾幙春雲碧水繞樓臺海日紅
沙鳥自飛還自宿百年無計與誰同

題彭澤後人吟樓

結屋在雲端悠然趣自安江山隨望遠星月近人寒劍
氣當空直詩情對酒寬往來庭畔叟只作晉時翁

遣懷

愁極鬢成絲滄江夢未歸鳥啼山雨急春盡故人稀曉
潤侵吟壁寒雲繞竹扉向來詩滿束應是與心違

客路和胡元魯韻

十載天涯客浮雲不定身煙波春雨渡燈火夜漁村世
事空為累人心未覺仁何時留片石歸老古松根

淮邊柳

寂寞淮邊柳春來自舞腰恨生爭戰地不得近官橋

雪鵠

風吹蘆葦鳴殘雪滿橋板不見櫂回人愁立沙汀晚

鳴鳩

金定四庫全書
卷四十一
何處芳草多相呼向深塢竹外立寒枝山南又春雨

道宮

千年興廢地仙訣字猶存露重雲生樹壇空月到門心
清無外事靜極是真源此境非凡世何人與續言

塞北

兵戰何時息邊塵染客旌亂鴉啼又歇荒草死還生島
雨連秋曙江風入鴈聲近淮民自悅應自宦情清

東齋書事

客裏吟情懶
天涯望欲昏
斷雲流澗水
殘月照衡門
猿嘯他山樹
砧聲何處村
浮名身外事
於此不須論

做樊川體

吟邊繞架書千卷
壁上梅花水一瓢
世事盡從忙裏過
年華空向靜中消
山雲宿雨籠殘日
汀草浮香滿小橋
對此不須惆悵去
野人今已悟吹簫

和路字

青山何人家
芳草滿樵路
猿鶴未歸來
殘月照煙樹

從軍行

茫茫塞月籠寒霧萬里征人不知數年少難消壯志多
精銳連營肅貌虎從軍何日見軍回但見日月長淮雨
烽煙散漫滿路歧邊聲颯颯秋風起天涯荒草馬成群
放去彎弓亂飛舞夜深更唱吳女歌古來白骨多於土

山中寓意

白髮今如許自吟還自愁滿山晴葉雨四壁老菴秋省
水知心靜觀雲覺事浮數年衰感意揮淚不能收

丙辰季夏避暑山中長松修竹恍若蓬萊異人
居走筆索句以紀其事

六月厭煩襟縱步情未足愛此石徑長渺渺清溪曲古
道何人居門閒對修竹好鳥發新聲靜極成幽獨西風
吹晚涼山影搖紅綠翹首興未闌青猿睡初熟

送人遊吳

閩門煙靄外地濶水城高蜃氣蒸吟鬢霜風入緼袍幾
程秋岬兩一飯野船篙若問當時事人誇有二豪

丙辰季夏雨中

天涯身尚寄何日向東州一夜霜欺鬢連朝雨送愁
夢
多吟作柴閒極嬾為仇若問浮生事無心即是謀

酬彭澤後人

不為折腰事田園足野情筆黏春霧重詩帶晚唐清
柳
巷閑漁艇山扉對水城論心暫來往無愧遠公名

寄靜佳朱明府

傷心猶立舊池臺日日西風送雨來別後思君無限事

一封書發兩番開

柳

汴水隋隄總寂寥
春風吹恨未曾消
長條本是無拘束
也向人前學舞腰

春陰書事呈正甫先生

二月花陰已覺遲
黃昏簾幙燕歸時
小欄獨立無人處
春雨春寒總欠詩

金陵道上

白香山詩集卷四十一
卷四十一
一望江水去不回
斷碑荒草舊宮臺
六朝陳迹皆如夢
夜夜寒潮送月來

山行

巖邊結屋與樵隣
流水桃花幾度春
行到碧雲無定處
深山怪木老如人

偶成

漁歌聽盡欲狂吟
一徑人家柳影深
天意似嫌花信蚤
東風吹雨又成陰

雪中寄巖泉

吟罷新詩祇自看
曉風吹恨上闌干
夜來雪滿前山路
誰對梅花說歲寒

春日湖上

繞隄衰草綠纖纖
老裏吟情覺未厭
應是踏青天氣近
柳條多插野人檐

首夏

新篁搖綠雨初晴
涼簟風生一枕清
昨日小亭幽夢覺

金史曰...
卷四十一
隔簾花影弄鶯聲

湘竹詞

湘魂何自怨千古尚名存
不種庭邊竹那知有淚痕

池上曲


曉雨生池荷圓珠漾新綠
入手不成珠空歌采蓮曲

觀化

閒觀造化餘靜極觀自性
蝴蝶忽飛來吾心已無競

宿雲軒

千峰雲未來
數樹芭蕉綠
風雨暗黃昏
何人共幽獨



宋百家詩存卷四十